

Oqaasiliortut tallimangornermi juulip ulluisa 27-ianni
2001, nal. 14.00 ataatsimiinnerannit imaqarniliaq

Peqataasut: Carl Chr. Olsen, Alibak Steenholdt, allatsigalugu Kristine Olsvig. Nuka Møller angalavoq, Sofia Geisler peqataasinnaanani nalunaarpoq, Kelly Berthelsenip aasaanerani sulinnigiffeqarnera peqqutigalugu pissarsiarineqanngilaq.


Oqaluuserisaq:

- Nunat Avannaamioqatigiit oqaatsit pillugit Sverigemi ataatsimeersuarnissaannut Oqaasiliortut peqataasinnaanannut apeqquut.

CCO.: Nunat Avannaamioqatigiit oqaatsit pillugit ataatsimeersuarnissaat Sverigemi aggustip 31-ianiit septembarip ulluisa aappaat ilanngullugu ingerlanneqartussaavoq. Oqaasiliortut piumagunik peqataatitsisinnaapput, tamannalu piviusunnigussappat angalanerup ilaani Dansk Sprognævnumut paasisassarsiorluni pulaanissaq siunertanut ilaavoq. Taassuma saniatigut pulaarneqarsinnaasutut eqqarsaataapput Institut for navneforskning aamma Kort & Matrikelstyrelsen.

CCO-ip angalanissaa Nordisk Sprogrådimit aningaasartuutaasussaavoq. Sofia Geisler Oqaasileriffimmut nalunaarpoq, angalanissaq piviusunnigussappat nammineq peqataasinnaanani. Ukioq naalakkersuisoq Lise Skifte Lennert Oqaasiliortut ataatsimeersuarnissamut peqataasinnaanannut apeqquummut ataatsimeeqatigineqarpoq. Naalakkersuisup isuma tapersersornartippaa, erseqqissaatigaluguli Oqaasileriffimmut aningaasaliissutaasimasut iluanni angalanissamut aningaasartuutissat kontonik nikisiterinikkut matussuserneqartariaqartut.

Taamaammat Oqaasileriffiup aningaasaqarniarnera eqqarsaatigalugu angalanissamut aningaasartuutissat matussuserniarnissaat kisimi




apeqqutaalerpoq, imaammat aningaasat kontomit allamit nuunneqarsinnaasut naatsorsuutigisamit ikinnerulersimammata.

Periarfissap aapparaa angalanissaq aalajangiusimaannarlugu taamaallaalli piffissaa aappaagumut nuullugu, 2002-mut Oqaasileriffimmut aningaasaliissutit ilaat immikkoortereerlugit. Angalanissaq kinguartinneqassappat pilersaarusionsiorluagaasumik aaqquissuunneqarsinnaassaaq, ilaatigut suliffeqarfiit amerlanerusut pulaaneqarsinnaassallutik, taamatullu Oqaasiliortut tamarmiullutik peqataanissaat orniginarnerulluni. Taassuma saniatigut aamma piviusorsiornerusaaq Oqaasiliortut 2002-miit ilaasortaat angalatinneqassappata. Taakku siunissami suleriaasissamik ujartuiniarnerminni Dansk Sprognævn paasisassarsiorfigisinnaassammassuk, paasisatillu piffissami toqqagaaffimmini atorluarsinnaassammatigik. AS.: Angalatinneqarnissamut Oqaasiliortut tamarmik peqataasinnaassanersut apeqqutaavoq. CCO-ip angalanissaanut aningaasartuutissat qulakkeeriigaapput taakkulu Oqaasileriffiup aningaasaqarniarneranut kalluaataanaviangillat. Sofia Geisler peqataasinnaanani nalunaareerpoq, taamaalilluni angalanissamut inuit amerlanerpaamik pingasut naatsorsuutigineqarsinnaalerput.

Angalanissaq una Oqaasiliortunit marloqiusamik pissarsiffiususaaq, tassa Dansk Sprognævniimit aammalu Nunat Avannaamioqatigiit oqaatsit pillugit ataatsimeersuarnerannit. AS-ip angalanissaq aalajangiusimavaa aammalu peqataanissaminut akuersilluni.

KO.: Maannamut aningaasatigut naatsorsuutit tunngavigalugit angalanissaq piviusunngussappat Oqaasileriffiup ukiup sinneranut aningaasaqarniarnera najummassimanartorsiorfiusinnaavoq. Angalanissamut ullut amerlassusissai aallaavigigaanni, angalanermut aningaasartuutit, unnuisarfinni unnuinerit, ataatsimeersuarnermi peqataanermut tapit ullormusiallu eqqarsaatigalugit minnerpaamik aningaasartuutaasusaaq 100.000,00 koruunit.



Oqaasileriffik Sprogsekretariatet

CCO.: Aalajanginnginnermi Nuka Møllerip Kelly Berthelsenillu angalanissamut qanoq isummernersut tusarniarneqaqqaassaaq. Taassuma saniatigut Oqaasileriffiup aningaasatigut inissisimamera naliliiffigineqaqqaassaaq, angalanissarlu aningaasatigut Oqaasileriffimmut artukkiutaassagaluarpat piviusut tunngavigalugit angalanissaq 2002-mi pisussanngorlugu kinguartittariaqassaaq.

Carl Chr. Olsen
Siulittaasoq

Kristine Olsvig
Allatsi

Oqaasileriffik – Sprogsekretariatet

Postboks 980, DK-3900 Nuuk, Kalaallit Nunaat, +299 327344, +299 327342 fax),
oqaasileriffik@greenet.gl